

Aruba awo tin su Atlas di Impacto Climatico



Parti di e ekipo di trabou cu a desaroya e website. D.r.p.d. Kim van Nieuwaal di International Panel for Deltas and Coastal Areas (IPDC), Ryan Peterson president di National Climate Resilience Council Aruba (NCRC), Toon Segeren di IPDC, Timo Kelder di Climate Adaptation Services (CAS), Elizabeth Guanipa di Verbum Works, Juliet Carvajal di Impact Blue y Rosabelle Illes, autor. Ausente riba e potret: Sophie van der Horst di CAS y Tony Sevold di Metabolic Foundation.

E siman aki, Aruba a lansa un atlas di impacto climatico dedica na Aruba. E portal digital di 'Climate Impact Atlas' (CIA) ta mostra e efectonan actual y proyecta pa nos isla. Durante e inauguracion oficial na Universidad di Aruba, varios experto local e internacional a hiba palabra y a elabora riba e desaroyo e importancia di CIA di Aruba.

E Atlas di Impacto Climatico (CIA) di Aruba ta presenta informacion clave tocante e impacto di cambio climatico na Aruba. Aunke varios organisacion publico y priva ta trahando pa mitiga e impacto di cambio climatico, e data cu ta disponibel pa Aruba ainda ta limita y fragmenta. Ademas di data, e CIA ta inclui varios mapa di impacto. Tambe ta inclui storia y ilustracion di impacto climatico na Aruba.

E CIA di Aruba ta e resultado di esfuerso conhunto, treciendo hunto e informacion y conocimiento disponibel den un espacio central pa e uzo di diferente stakeholder y sector. E obhetivo ta pa fomenta un comprendemento general y bista mas profundo entre stakeholders riba e riesgo y impacto di cambio climatico pa asina desaroya un resiliencia climatico di un manera husto, transparente y inclusivo.

E CIA di Aruba ta parti di e Consejo Nacional di Resiliencia Climatico (NCRC) y ta habri pa publico y tur interesado riba e pagina web di NCRC (ncrc-aruba.org). NCRC ta un colaboracion di instancia publico, priva, civil y academico, mescos cu socionan internacional, pa avansa e resiliencia climatico na y pa Aruba. P'esey comparti data climatico ta esencial entre organisacionnan publico y no-gubernamental, mescos cu e sector priva y comunidad cientifico local, regional y internacional.

E CIA di Aruba ta desaroya hunto cu NCRC y CAS Foundation (Climate Adaptation Services), ademas di varios instancia y experto local, incluyendo Metabolic Foundation (Sr. Tony Sevold), Sra. Rosabelle Illes, Universidad di Aruba, Centraal Bureau voor de Statistiek (CBS), Departamento Meteorologico Aruba (DMA), Directie Natuur en Milieu (DNM) y Aruba Conservation Foundation (ACF). E proyecto ta financia pa e International Panel on Deltas, Coasts and Islands (IPDC) di Hulanda.

Pa mas informacion, por tuma contacto na: climate@ncrc-aruba.org